

KAS legeaz kanpo uzten duen autoa gezur eta akatsez josia dagoela diote kide ohiek

KAS erakundea duela 4 urte desagertu zela oroitarazi diote Baltasar Garzoni

HB, Senideak, AABak, Jarrai eta beste zenbait taldetako hogeit bat kide ezagunek gaitzetsi egin zuten atzo KAS legeaz kanpo uzteko Garzonek eginiko «auto gezur eta akatsez josia». Duela lau urte desagertu zen erakunde bat orain legeaz kanpo uztea «esperpentoa» dela esan, eta aurrerantzean edozein disidentzia politiko terrorismotzat jotzeko bidea ematen duela salatu zuten.

Iñaki Uriarte / Bilbo



Baltasar Garçon epaileak KAS legeaz kanpo uztea gaitzetsi zuten atzo hainbat kide ohik prentsaurrekoan.

XOUSA SIMAL

KAS legeaz kanpo utzi. 26 lagun auzipetu, horietako 10 espetxean iraunarazi, Egin egunkaria eta maiatzean itxitako beste zenbait enpresa zarratuta eduki eta ondasunak bahi ditzatela agintzeko Garzonek zabaldu zuen autoaren «gezurak eta akatsak» salatu zituzten atzo prentsaurrekoan. Fito Rodriguezek eta Mila Idiakez, ezker abertzaleko hainbat kide ezagunen izenean, KASi buruz Garzonek eginiko irakurketa politikoa gaitzetsi, akats historikoak agertarazi eta «epategi berezi» horren jazarpena salatu zuten.

Arnaldo Otegi, Raquel Peña, Pablo Gorostiaga eta Kepa Gordejuela parlamentarioak ez ezik, Tomas Karrera, Julen Zelarain, Iñaki O'Shea, Iñaki Gil de San Vicente, David Pla, Ruben Nieto, Juan Maria Mendizabal, Mikel Egibar, Jose Antonio Torre Altonaga eta beste zenbait zeuden prentsaurrekoan. Haien guztien izenean, Mila Idiakez eta Fito Rodriguezek «gezurrez eta akatsez josia» iritzi zioten Garzonek KASi buruz egindako autoari.

«Klabeak nahasten dira, datuen ezagupenik eza nabar-

mena da, data eta gertakizun historikoak okertu eta faltsutu egiten dira; besteak beste, KAS erakundea orain dela lau urte desagertu zela». Rodriguezen hitzetan, «halako hankasartze izugarriak» egiteak daukan azalpen bakarra «Espainian dagoen izugarritzko inboluzio politikoa da».

Rodriguezek eta Idiakezen hitzetan, KASeko militante ohiek ez dute egun «beraiek euskal independentismoaren inguruko sektoreetan aritzeak eskaini liezaiekeen erreferentzia politikoa baino». Idiakezek oroitarazi zuen Entzutegi Nazionalan 12 ikerbide daudela zabalik, eta horietan hainbat lagun identifikatuta ageri direla KASKide eta KASen ingurukotzat. Hala ere, aurretik gertatutakoa Garzonek ezabatzerik ez duela izango nabarmendu zuen Idiakezek.

Mila Idiakez: «Garzonek etorkizunean pentsatuz egin du ebazpena, marko politikoa legearen estutasunetik kanpo aldatu nahi lukeen edozein praktika desagertarazteko helburuz»

Disidentzia politikoa desagertarazteko xedea • Idiakez azaldu zuen KASen aurkako erasoek ez dutela erakunde hori helburu, mugimendu independentista bera baizik. Kide izandakoei Garzonen autoak ekar diezazkiekeen ondorio penaletatik haratago, larri iritzi zieten ebazpenak etorkizunean izan ditzakeen ondorioei. «Kezkagarria da; Garzonek etorkizunean pentsa-

tuz egin du ebazpena, marko politikoa legearen estutasunetik kanpo aldatu nahi lukeen edozein praktika politiko desagertarazteko helburuz».

KASek 1975ean sortu zenetik aurrera izan dituen bilakaera eta ardatz nagusiak laburbildu ostean, Rodriguezek agerian utzi zuen KAS sekula ez dela erakunde klandestinoan izan, nahiz eta izaera alegala izan. «KASeko militanteak ez dira sekula izan klandestinoak, hemen gauden guztiok publikoak gara», ohartarazi zuten. Prentsaurrekoan zeuden Begoña Capape kazetaria eta Pablo Gorostiaga KASeko kide izanaren ondorioz terrorismo delituagatik auzipetuta egotea arbuatu zuten. «ETaren helburu berdintsuak izanagatik, helburuengatik, hau da, ideologiagatik jazarri dituzte», berretsi zuen Fito Rodriguezek. X

Entzutegi Nazionalak erabaki du HBk 300 milioi pezeta jaso behar dituela

■ 1989an izandako ordezkariaren parlamentarioaren ordaina izango da

Erredakzioa / Donostia

ESPAINIAKO Entzutegi Nazionalako Kontentzio-Administratiboko Salaren erabakiz, HBk 1989ko legeagintzaldiari dagokion 301 milioi pezetako diru laguntza jasoko du (12 milioi libera inguru). Izan ere, HBk errekurtsioa aurkeztu zuen 1989an eta 1986an lortutako diputatuei zegokien diru laguntza jaso ez zuelako. Entzutegi Nazionalak, baina, errekurtsioaren atal bat baino ez du onartu, 1986ari dagokion diru laguntza ez baitute jasoko, HBk 1986. urteko legeagintzaldiari dagozkion beste 300 milioi pezeta jaso beharko litzuke.

Espainiako Entzutegi Nazionalak azaldutakoaren arabera, 1986ari dagokion diru laguntza ez du onartu, HBko ordezkariak ez zutelako Konstituzioaren zina egin. Bestalde, 1989an zin egin zutenek, 300 milioi ematea onartu du, «legeak behartuta» egin bazuten ere.

1989an eta 1986an Administrazioak ez zuen onartu HBri alderdi politikoaren finantzaketa legearen arabera diru laguntza ematea, eta hori izan zen HBk 1992an errekurtsioa aurkezteko arrazoia. Lege horren arabera, alderdi politikoek lortzen duten diputatu kopuruaren arabera diru laguntza jasotzeko esku-bidea dute.

Behin Entzutegi Nazionalaren erabakia jakinda, Espainiako Estatuko abokatuak hamar eguneko epea du Auzitegi Gorenean errekurtsioa jartzeko. X



LEITZAKO UDALA

LEITZAKO ARAU SUBSIDIARIOEN ALDAKETA PUNTUALA.

Lurzoru ez urbanizagarrian familiabakarko etxebizitza berriak eraiki ahal izateko eraikinen arteko 100 metroko distantzia minimoa kentzeko asmoz. Arautegi Urbanistikoaren 50. artikulua aldaketak hasiera batean onartu zuen Leizako Udabatzak 1998ko azaroaren 27an eginiko bilkuran, era honetan, Lurraldearen Antolamendu eta Hirigintzaren gaineko Foru Legearen garapenerako Erregelamenduaren 9. artikulura Leizako Arau Subsidiarioak egokituz. Hau dena kontutan harturik, artikulua erredakzio berriak honela dio:

Arautegi Urbanistikoaren 50. artikulua:
«B eremua.- Zonalde honetan eremuaren nekazari eta abeltzaintzarako erabilpenarekin harremana daukaten eraikinak onartuko dira, beti ere, aipatutako harremana behar den moduan justifikatzen bada.
Gainera, familiarentzako etxebizitza isolatuak onartuko dira, beti ere, hurrengo baldintzak betez gero.

- Lurzati minimoa: 4.000 metro karratu.
- Gehienez ere, lurzatiaren %5eko okupazioa onartzen da.
- Ez dira onartuko bi altuera baino gehiagoko eraikinak.
- Eraikinaren gehieneko altuera 7-metrokoa izanen da.»

Leiza, 1998ko abenduaren 16a.
ALKATEAK.

LEHIAKETA PUBLIKOA

Xedea: Bedia eta Debako nasak luzatzeko lanak.

Bediako lanen gehieneko zenbatekoa: 5.500.000 ptz. (B.E.Z. a sartu gabe).

Debako lanen gehieneko zenbatekoa: 9.000.000 ptz. (B.E.Z. a sartu gabe).

Pleguen eskaera: **EuskoTreneko** Erosketa eta Kontratazio Sailean, Atxuri, 6 Bilbo.

Eskaintzen aurkezpena: **EuskoTreneko** Erosketa eta Kontratazio Saila, Atxuri, 6 Bilbo, 1998ko abenduaren 23eko eguerdiko 12ak baino lehen.

Iragarki honek eragindako gastuak emakidalortzen duen erakundeak ordainduko ditu.

Bilbo, 1998ko abenduak 15

EuskoTren

CONCURSO PÚBLICO

Objeto: Obras de prolongación de los andenes de Bedia y Deba.

Importe máximo obra Bedia: 5.500.000 ptas. (s/I.V.A.).

Importe máximo obra Deba: 9.000.000 ptas. (s/I.V.A.).

Solicitud de Pliegos: En el Área de Compras y Contratación de **EuskoTren**, c/ Atxuri, 6 Bilbao.

Presentación ofertas: En el Área de Compras y Contratación de **EuskoTren**, antes de las 12 horas del día 23 de diciembre de 1998.

Los gastos de este anuncio serán asumidos por la entidad que resulte adjudicataria.

Bilbao, a 15 de diciembre de 1998

